

四庫全書

史部

欽定四庫全書

史部

欽定續通志卷四百五十五至

七

編修<sub>臣</sub>謝振定覆勘

總校官原任侍講<sub>臣</sub>王燕緒

欽定四庫全書

欽定續通志卷四百五十五

列傳

元

嚴實

忠濟  
忠洞

劉通

岳存

王玉汝

劉伯林

黑馬  
元禮

元振

郭寶玉

德海  
侃

石天應

嚴實字武叔泰安長清人志氣豪放不治生產喜交結

施與落魄里社間屢以事繫獄俠少輩為出死力乃得脫歲癸酉太祖率兵自紫荆口入分畧山東河北河東而歸金東平行臺調氏兵以實為百戶甲戌泰安張汝楫據靈巖遣別將攻長清實破走之以功授長清尉戊寅權長清令宋取益都乘勝而西行臺檄實守禦實出督租比還而長清破俄以兵復之有譖于行臺者謂實與宋有謀行臺以兵圍之實挈家避青崖宋因以實為濟南治中分兵四出所至無不下於是太行之東皆受

實節制庚辰金河南軍攻彰德守將單仲求救實以兵  
赴之比至而仲被擒實知宋不足恃乃謁太師穆呼哩  
於軍門挈所部彰德大名磁洛恩博滑濬等州三十萬  
戶來歸穆呼哩承制命實行尚書省事進攻曹濮單三  
州皆下之偏將李信留鎮青崖嘗有罪懼誅乘實出殺  
其家屬降於宋辛巳實以兵復青崖擒信誅之進攻東

平金守將赫爾根

太祖紀及穆呼哩傳俱作孟古績通鑑亦作赫爾根按金史蒙古綱傳云

一名赫爾根故記載各異

棄城遁實入居之壬午宋將彭義斌率師

取京東州縣實將晁海以青崖降盡掠實家乙酉義斌  
圍東平實約次將布爾罕合兵攻之兵久不出城中食  
且盡乃與義斌連和義斌亦欲藉實取河朔而後圖之  
請以兄事實七月義斌下真定道西山與布爾罕等軍  
相望分實以帳下兵陽助而陰伺之實赴布爾罕軍與  
之合遂與義斌戰宋兵潰擒義斌京東州縣復為實有  
是冬穆呼哩之弟岱遜取彰德明年取濮東平又明年  
穆呼哩之子博囉取益都實皆有功焉庚寅朝太宗

于牛心之幄殿甲午朝於和琳授東平路行軍萬戶丁酉詔實母事征伐初岱遜下彰德繼破濮州皆欲屠之賴實言得免其後於曹楚丘定陶上黨皆然時兵由武關出襄鄧實在徐邳間以為河南破屠戮必多乃載金繒往贖之且約束諸將毋敢妄有殺掠靈璧一縣當誅者五萬人實悉救之會大饑民北徙者多餓死又法藏匿逃者保社皆坐逃亡無所託殭尸蔽野實命作糜粥置道旁全活者衆實部曲有逃歸益都者數十人益都

破皆獲之以為必殺實置不問王義深者義斌之別將  
聞義斌敗將奔河南實族屬在東平者皆為所害河南  
破實獲義深妻子厚周卹之送還鄉里庚子卒中統二  
年追封魯國公諡武惠子忠貞忠濟忠嗣忠範忠傑忠  
裕忠祐

忠濟一名忠翰字紫芝辛丑從其父入見太宗命襲東  
平路行軍萬戶管民長官開府布政一法其父治為諸  
道第一領兵畧淮漢偏裨部曲戮力用命定宗憲宗即



位之始皆加褒寵忠濟初統千戶十有七乙卯朝命括  
新軍忠濟弟忠嗣忠範為萬戶以次諸弟暨勲將之子  
為千戶忠濟皆統之己未世祖南伐詔率師由間道會  
鄂親率勇士梯衝登城師還忠濟選勇敢二千人命千  
戶將之甲仗精銳所向無前有言其威名太盛者中統  
二年召還京師命忠範代之忠濟治東平日嘗貸財為  
部民納逋賦歲久愈多及謝事債家執券來徵帝聞之  
命發內藏代償東平廟學故隘陋改卜高爽地於城東

教養諸生後多顯者幕僚如宋子貞劉肅李昶徐世隆  
俱為名臣至元二十三年授中書左丞行江浙省事以  
老辭二十九年召其子瑜入侍三十年卒諡莊孝

忠嗣少從張澄商挺李楨學知經史大義辛亥其兄忠  
濟授以東平人匠總管選領單州防禦使事乙卯充東  
平路管軍萬戶丁巳從忠濟畧地揚州取邵伯埭首立  
戰功己未南征從忠濟渡淮分兵出桂車嶺與宋兵相  
拒三晝夜殺獲甚衆渡江抵鄂分部攻城九十餘日戰

甚力中統三年李壇叛宋兵攻鄆州勢張甚徐州總管

世祖紀作  
徐邛總管

李誥格降於宋忠嗣從大帥安圖救靳縣復

徐州執李誥格殺之攻鄒之嶧山滕之牙山多所殺獲  
四年朝廷懲青齊之亂大藩子弟不得親政於是罷官  
家居至元十年卒

劉通字仲遠東平齊河人初從嚴實來歸實薦於太師  
穆呼哩以通為齊河總管授德州總管行軍千戶宋將  
彭義斌攻齊河城率衆夜登通與六七人鼓譟而進宋

人驚懼墜溺死者甚衆明日復合圍通令守陴者植槩  
如擲俄撤去宋人懼其向已也大潰義斌僅以數騎免  
遷德州萬戶軍民總管歲丙辰卒子復亨襲為行軍千  
戶憲宗西征命攝萬戶統東平軍馬攻釣魚山苦竹寨  
有功師還兼德州軍民總管李壇叛遣使招復亨復亨  
立斬之時遣兵討賊集濟南乏食復亨盡出家資以濟  
師世祖嘉之至元十年遷征東左副都元帥統軍征日  
本與倭兵十萬遇戰敗之還招降淮南諸郡邑累官淮

西道宣慰使元帥二十年卒子淵至元十一年授徐邳屯田總管下千戶十二年從右丞巴爾默色攻淮安十三年與宋人戰昭信軍南靖平山俱有功進管軍總管十五年從元帥張弘範征閩廣漳韶諸州又從攻崖山遷副招討二十四年從征交趾鎮南王托歡命領水步軍二萬攻萬劫江繼攻靈山城賊衆迎敵大敗之二十八年捕寇淞東三十一年兼領紹興淞江五翼軍守杭州大德十一年卒

岳存字彥誠大名冠氏人歸東平嚴實授帥府都總領  
保冠氏會金從宜鄭倜據大名距冠氏僅三十里遣兵  
來攻不得志復自將萬人合圍勢甚張存率死士百餘  
突出西門金人退走存追之越境乃還歲己丑從嚴實  
及武仙戰于彰德西敗之庚寅存率步騎五百人還至  
開州南與金將張開遇開衆萬餘存軍依大林戒其軍  
曰彼衆我寡不可輕動當聽吾鼓聲為節乃命騎士居  
前步卒次之與敵相去僅二十步鼓作無不一當百開

衆大潰追二十餘里不損一卒而還辛丑升本縣丞移  
治楚邱己卯告老中統三年卒子天禎襲父職冠氏縣  
軍民彈壓從圍襄樊修立百丈山鹿門等堡天禎率銳  
士冒矢石從樊城東北先登為糧木所傷墮地復躡梯  
以登手刃數人戰焦山平奉化賊錄功升管軍千戶江  
南平從元帥張弘範覲帝於柳林授福州路總管平尤  
溪賊秩滿改吉州平永新賊後遷建康首定救荒之政  
至大二年卒子果會昌州同知

王玉汝字君璋郢人少習吏事行臺嚴實入據郢署為  
掾史補行臺令史中書令耶律楚材過東平竒之版授  
東平路奏差官以事至京師遊楚材門待之若家人父  
子戊戌議裂東平地分封諸勲貴各私其入與有司無  
相關玉汝曰若是則嚴公事業存者無幾矣夜靜哭於  
楚財帳後楚材惻然使詣帝前陳懇玉汝進言曰嚴實以  
三十萬戶歸朝廷崎嶇兵間三棄其家室卒無異志豈  
與他降者同今裂其土地析其人民非所以旌有功也



帝嘉玉汝忠款且以其言為直由是得不分實子忠濟  
襲職授左右司郎中遂總行臺之政憲宗即位有旨令  
常賦外歲出銀六兩謂之包垛銀玉汝曰民力不支矣  
糾率諸路管民官愬之闕下得減三分之一累官奏定  
軍節度使兼兗州管内觀察使充行臺參議以病謝歸  
日以經史自娛後忠濟使人謂之曰君閒久矣可暫起  
為吾分憂以參議印強委之不得已起視事僅五六日  
裁畫一新逾月卒

劉伯林濟南人金末為威寧防城千戶歲壬申太祖圍威寧伯林以城降帝問在金為何官對曰都提控即以原職授之與太傅耶律托輝同征討招降山後諸州太祖北還留伯林屯天成邊金兵前後數十戰進攻西京錄功充西京留守兼兵馬副元帥癸酉從征山東攻下梁門遂城乙亥同國王穆呼哩攻破燕京丁丑復從大軍攻下山東諸州戊寅同攻下太原平陽己卯破潞絳及火山聞喜諸州縣時欲徙聞喜民實天成伯林以北

地喪亂人艱於食力爭而止部曲獲俘萬計悉縱之在  
威寧十餘年務農積穀與民休息嘗曰吾聞活千人者  
後必封吾之所活何啻萬餘子孫必有興者辛巳以疾  
卒封秦國公諡忠順子黑馬

黑馬名巖字孟方始生時家有白馬產黑駒故以為小  
字後遂以小字行驍勇有志畧年幾弱冠隨父征伐大  
小數百戰出入行陣畧無懼色嘗獨行遇金兵圍本部  
十三人即奮劒入圍手殺數人十三人皆得脫歲壬午

襲父職為萬戶兼都元帥癸未從國王穆呼哩攻鳳翔  
不克回屯絳州又從博囉攻西夏唐古甲申從阿禪諾  
延攻破東平大名乙酉金降將武仙據真定以叛從博  
囉討之破真定武仙遁去又破金將呼齊呼於隘孤嶺  
斬之己丑太宗即位始立三萬戶以黑馬為首重喜史  
天澤次之授金虎符充平陽宣德等路管軍萬戶仍總  
管漢軍從征回回河西諸國及破鳳翔西河沔州諸城  
堡庚寅睿宗入自大散關假道於宋以伐金命黑馬先

驅至三峯山遇金將哈達大破之乘勝破香山寨及釣

州會增立七萬戶仍以黑馬為首重喜史天澤嚴實等

次之

按徐霆黑達事畧云漢地萬戶四人嚴實有山東之兵史天澤有河東河北之兵張柔有燕南之兵

劉黑馬有燕薊之兵本傳言三萬戶七萬戶且不及張柔與事畧互異

癸巳從破南京甲

午從破蔡州滅金乙未同都元帥塔海幹布征西川辛

丑改授都總管萬戶統西京河東陝西諸軍萬戶入覲

帝慰勞之命巡撫天下察民利病應州郭志全反脅從

誅誤者五百餘人有司議盡戮之黑馬止誅為首者數

人餘悉從輕典癸丑從憲宗至六盤山命守商州宋人不敢犯丁巳入覲請立成都以圖全蜀帝從之命管領新舊軍民小大諸務中統元年廉希憲商挺宣撫川陝時密喇和卓握重兵希憲與挺慮其為變以黑馬有膽智使乘驛矯詔誅之三年命兼成都路軍民經畧使瀘州被圍黑馬已屬疾猶親督轉輸不輟未幾卒封秦國公諡忠惠子十二人元振元禮顯

元振字仲舉隨父入蜀鎮商鄧以元振攝萬戶時年二

十既蒞事號令嚴明賞罰不妄宿將皆敬服之憲宗伐宋駐蹕釣魚山以元振與納琳為先鋒中統元年世祖即位庶希憲商挺奏以為成都經畧使總管萬戶宋瀘州守將劉整密送款求降黑馬遣元振往受之諸將皆疑劉整元振曰宋權臣當國將士離心整此舉無可疑者遂行至瀘整開門出迎元振棄衆下馬示以不疑明日請入城元振釋戎服從數騎與整聯轡而入飲燕至醉整心服焉宋瀘州主帥俞興率兵回瀘州攻五月城

幾陷或勸元振曰整本非吾人與俱死無益元振曰人以誠歸我豈可以急而棄之且瀘之得失關國家利害吾有死而已殺所乘馬犒將士募善游者齎蠟書至成都求援未幾援兵至元振與整出城合擊興兵敗走捷聞賜賚甚厚至元七年議以勲舊之家事權太重宜稍裁抑遂降為成都副萬戶十一年命兼潼川路副招討使十二年卒子緯數從父行軍元振卒緯襲職為萬戶守潼川創立遂寧諸處山寨從圍釣魚山數戰有功攻



合州授潼川路副招討累遷至陝西行省參知政事卒  
元禮性渾厚有謀常從父在軍中歲甲寅為京兆路鄂  
囉萬戶再遷潼川路漢軍都元帥至元二年宋制置夏  
賁率軍犯潼川元禮屢破之復大戰於蓬溪自寅至未  
勝負不決激厲將士曰丈夫當以死戰取功名時不可  
失也即持長刃大呼突陣所向披靡將士咸奮大敗賁  
兵斬首萬餘級生擒千餘人捷奏賜賚有加召入朝命  
復還潼川立蓬溪寨奏修眉州城屯兵以扼嘉定往來

之路世祖從之四年命平章趙寶臣往視可否或以為  
眉州荒廢已久立之徒費財力元禮力爭之遂興役七  
日而畢元禮鎮眉州五年召入朝乞解官養母從之九  
年起授延安路總管卒

郭寶玉字玉臣華州鄭縣人唐中書令子儀之裔也金  
末封汾陽郡公引軍屯定州歲庚午會太師穆呼哩軍  
至寶玉舉軍降穆呼哩引見太祖問取中原之策寶玉  
對曰西南諸蕃勇悍可用宜先取之藉以圖金必得志

焉又言建國之初宜頒新令帝從之於是頒條畫五章  
出軍不得妄殺刑獄惟重罪處死其餘雜犯量情笞決  
軍戶蒙古色目人每丁起一軍漢人有田四頃人三丁  
者僉一軍年十五以上成丁六十破老站戶與軍戶同  
民匠限地一頃僧道無益於國有損於民者悉行禁止  
帝將伐西蕃受寶玉綽滿都鎮撫癸酉從穆呼哩取永  
清破高州降北京龍山從錦州出燕南破太原平陽諸  
州縣甲戌從帝討契丹遺族歷庫徐克國鄂爾多等城

破其兵三十餘萬寶玉胸中流矢帝命剖牛腹置其中  
少頃乃蘇尋復戰收伯寶巴里必實南等城次呼展河  
西人列兩陣迎敵戰方酣寶玉呼曰西陣走矣其兵果  
走追殺幾盡進兵下塔實干城次阿穆爾河敵築十餘  
壘陳船河中俄風濤暴起寶玉令發火箭一時延燒乘  
勝直前破護岸兵五萬遂屠諸壘收瑪勒四城辛巳庫  
奇雅國威錫蘇爾坦汗破奈曼國引兵據塔實干聞帝  
將至棄城南走屯大雪山寶玉追之遂奔印度壬午從

哲伯蘇布特二先鋒收契丹渤海等國有功累遷斷事官卒於賀蘭山子德海德山德山以萬戶破陝州攻潼關卒

德海字大洋金末擊宋將彭義斌於山東敗之知父寶玉北降遁入太行山大軍至乃出降為綽滿彈壓從先鋒哲伯西征渡克色勒伯頁攻鐵山斬首三萬級踰雪嶺西北萬里進軍次達哩國悉平之乙酉還至崢山吐蕃帥紐掄回紇帥阿必鼎反復破斬之戊子從元帥庫

庫楚游騎入關中金人閉關拒守德海引驍騎斬關入  
直擣凌風渡寨後兵不至引還己丑破南山八十三寨  
陝西平假道漢中歷荆襄而東與金將武仙軍遇於白河  
敗走之斬首二萬餘級復破金伊喇聶赫軍於鄧至鈞  
州辛卯據太宗紀  
應作壬辰睿宗軍自洛陽來會於三峯山金人  
溝地立軍圍之雪深三尺溝中軍僵立刀槊凍不能舉  
我軍衝圍而出金人死者三十餘萬其帥完顏哈達伊  
喇布哈走匿浮圖上德海命掘浮圖基出其柱而焚之

按金史完顏哈達伊喇布哈傳載哈達走鈞州藏密室  
中城破發而殺之布哈走京師追及擒之械至官山被  
殺本傳并為一事與金史互異

完顏色埒默單騎遁還洛陽又破金將

喀濟喀兵於中牟完顏色埒默復帥軍來拒戰又破之  
以功遷右監軍壬辰破金師於黃龍岡癸巳取申唐二  
州甲午河南復叛德海往討之砲傷其足以疾歸卒先  
是太宗詔大臣呼圖克等試天下僧尼道士選精通經  
文者千人有能工藝者則命小通事哈準等領之餘皆  
為民又詔天下置學廩育人材立科目選之入任皆從

德海之請也子侃

侃字仲和幼為丞相史天澤所器留於家教養之弱冠為百戶鷲勇善謀壬辰破金將博索兵於新衛州遂渡河襲金主至歸德敗其兵於闕伯臺即從蘇布特攻汴西門金帥崔立降以功授總把從天澤屯太康復以下德安功為千戶壬子改綽滿諾延從宗王錫里庫西征癸丑至穆錫國破其兵五萬下一百二十八城丙辰至竒塔卜其城在檐寒山上懸梯上下守以精兵築夾城



圍之莫能克侃架炮攻之乃降又說降烏爾古納丁已  
至烏喇爾城設伏以待敵至盡殺之又西至阿伊昂破  
其游兵三萬至克實密爾部降之西戎大國也地方八  
千里傳四十二世勝兵數千萬侃兵至破其兵七萬屠  
西城又破其東城東城殿宇皆構以沈檀木舉火焚之  
香聞百里得七十二絃琵琶五尺珊瑚燈檠其國主自  
縛詣軍門降拔三百餘城又西行三千里至大房其將  
周濟致書請降左右信之不為備侃曰欺敵者亡乃嚴

備以待周濟果來邀我師侃敗之下其城一百八十五  
又西行四十里至密實勒會日暮已休復驅兵起留數  
病卒西行十餘里銜枚傳箭敵潛兵夜來襲殺病卒見  
軍至大驚遂降戊午錫里庫命侃西渡海收布拉特侃  
喻以禍福即來降師還至實喇資敵人來拒侃直出掠  
陣一鼓敗之至布圖侃以奇兵掩擊大敗之己未破烏  
林游兵四萬得城一百二十西南至奇里勒楊和達瑪  
鼎降西域平侃告捷至釣魚山會憲宗崩乃還鄧開屯

田立保障世祖即位侃上疏陳建國號築都城立省臺  
興學校等二十五事及平宋之策其畧言宋據東南以  
荆襄為要地若先取襄陽直趨臨安則江淮巴蜀不攻  
自平後皆如其策中統二年擢江漢大都督府理問官  
三年李璫及徐州總管李誥格俱反宋夏貴復來犯  
遣史天澤薦侃世祖召見問計所出曰築城環之坐待  
其困計日可擒也帝然之授徐邳二州總管誥格之弟  
復與夏貴以兵來擾邊境侃出戰敗之至元二年有言

當解史天澤兵權者天澤遂遷他官侃亦調同知滕州  
三年侃上言請伐宋並請立屯田於淮北四年徙高唐  
令兼治夏津武城等五縣五年邑人吳乞兜濟南道士  
胡王反討平之七年改白馬令僧臧羅漢與彭德趙當  
驢反又平之帝以侃習於軍務擢為萬戶從軍下襄陽  
江南平遷知寧海州居一年卒侃行軍有紀律所至興  
學課農吏民畏服子秉仁秉義

石天應字瑞之興中永德人太祖時太師國王穆呼哩

南下天應率衆迎謁穆呼哩承制授興中府尹兵馬都  
提控俾從南征天應造戰功之具臨機應變捷出如神  
以功拜元帥右監軍戍燕屢從穆呼哩大小二百餘戰  
常以身先士卒累功遷右副元帥辛巳秋從穆呼哩征  
陝右攻拔葭州因說太師曰此州當金夏之衝宜命將  
守之多造舟楫以備不虞穆呼哩然之表授陝西河東  
路行臺兵馬都元帥以勁兵五千留守葭蘆遂造舟楫  
建浮橋分兵四出悉定葭綏之地一日謁穆呼哩於汾

水東穆呼哩諭以進取之策天應遂鎮謂佐將曰聞河東  
西皆平川廣野可以駐軍規取關陝諸君以為何如或  
言河中雖用武之地南有潼關西有京兆皆金軍所屯  
且民新附其心未一守之恐貽後悔天應曰河中雖迫  
於二鎮實用武立功之地北接汾晉西連同華若起漕  
運以通餽餉則關內可尅期而定關內既定長河以南  
在吾目中矣遂移軍河中既而金軍果潛入中條襲河  
中天應先遣驍將吳澤

張巨衍撰穆呼  
哩行錄作吳權

伏兵要路澤勇

而嗜酒是夕方醉卧林中金兵由間道直抵城下時兵  
燼後守具未完新附者爭縋城而去敵乘隙入天應見  
火舉知敵已入奮身角戰或勸西渡河天應曰先時人  
諫我南遷吾違衆而來此事急棄去是不武也縱太師  
不罪我何面目以見同列乎少頃敵兵四合天應飲血

力戰至日午死之子煥中知興中府事執中行軍千戶

受中興中府相副官

按穆呼哩傳云以天應子烏格襲  
領其衆今考天應子無名烏格者

豈名有不同故  
彼此互異歟

天應死事時姪佐中在軍中伺敵少懈

突圍而出趨穆呼哩行營求得蒙古軍數千回與敵戰  
敗之穆呼哩嘉其勇奏授興中府千戶子安琬襲職從  
征大理討李璫皆有功至元十三年分寧叛行省檄安  
琬討之賊背山而陣安琬突陣而入手刃中賊背生擒  
之累功至右衛親軍副都指揮使後授大同等處萬戶  
屯田紅城大德三年李萬戶當戍和寧親老且病安琬  
請代其行及還以病卒子居謙襲職後改忠翊侍衛親  
軍都指揮使





欽定續通志卷四百五十五

欽定四庫全書

欽定續通志卷四百五十六

列傳

元十

耶律瑠格

耶律阿哈

耶律托噶

伊喇聶珂

邁努

元臣

王珣

榮祖

舒穆魯額森

舒穆魯明安

耶律瑠格契丹人仕金為千戶太祖起兵朔方金人疑

遼遺民有他志瑠格不自安歲壬申遁至隆安韓州糾壯士剽掠州發卒追捕瑠格擊走之因與伊德募兵衆至十餘萬推瑠格為都元帥伊德副之威震遼東太祖命阿禪等行軍至遼遇之問所從來瑠格具陳效順之意乃率所部會於金山刑白馬白牛北望折矢以盟阿禪曰吾還奏當以征遼之責屬爾金人遣和碩帥軍六十萬來攻瑠格瑠格度不能敵亟馳表聞帝命阿禪博多歡阿嚕達哈引千騎來會瑠格以姪安努為先鋒橫衝

和碩軍大敗之以所得輜重獻帝召阿裨還以克特格爾副瑠格屯其地癸酉衆推瑠格為王立妻約囉氏為妃以其屬伊實布為郡王布色僧嘉努伊德李嘉努等

為丞相元帥尚書圖古勒珠巴克行元帥府事國號遼

按續通鑑云改元元統傳失載

甲戌金遣青格誘以重祿使降不從青

格度勢不可反臣之金主怒復遣宣撫萬努領軍攻之瑠格逆戰金兵大潰萬努奔東京安東同知阿琳懼遣使求附於是盡有遼東州郡遂都咸平號為中京乙亥

瑠格破東京克特格爾娶萬努之妻李儂娥瑠格不直  
之有隙既而伊實布等勸瑠格稱帝瑠格與其子實沙

奉金幣入覲帝大悅問舊何官對曰遼王

按續通鑑云  
蒙古主以為

元帥令居廣  
寧與此異

帝命賜金虎符仍遼王徵其戶籍三千人

為質遣蒙古三百人往取之瑠格使竒努等與俱且命

詰克特格爾拘繫以來克特格爾懼與伊實布等以眾

叛殺所遣三百人丙子竒努金山青格圖古勒等推伊

實布僭帝號於澄州國號遼改元天威以瑠格凡都呼

為平章方閱月其元帥青格叛歸於金伊寶布為其下  
所殺推其丞相竒努監國與其行元帥雅爾分兵民為  
左右翼屯開保州闕金將衆嘉努引兵攻敗之瑠格引  
蒙古軍數千適至得兀都呀并妻約囉氏遂追擊雅爾  
軍還渡遼河招撫懿州廣寧徙居臨潢府竒努走高麗  
為金山所殺金山自稱國王改元天德圖克勒復殺金  
山而自立哈沙又殺之亦自立戊寅瑠格引蒙古契丹  
及東夏國諸軍圍哈沙高麗助兵四十萬克之哈沙自

經死自乙亥歲遼東反覆至己卯春瑠格復定之庚辰瑠格卒妻約囉氏入奏會帝征西域皇太弟承制以約囉氏權領其衆丙戌帝還約囉氏攜次子善格特爾格永安及從子塔塔爾孫壽果努見帝於河西慰勞甚至約囉氏奏曰瑠格既沒官民乏主其長子實沙扈從有年願以次子善格代之使歸襲爵帝曰實沙積功為巴圖爾不可遣當令善格襲其父爵約囉氏拜泣曰實沙者瑠格前妻所出嫡子也善格者婢子所出若立之是



私已而蔑天倫竊以為不可帝歎其賢給驛騎四十從  
征河西許以實沙襲爵而留善格塔塔爾果努於朝惟  
遣其季子永安從約囉氏東歸丁亥帝謂實沙曰朕以  
兄弟視爾父則爾猶吾子爾其與吾弟布拉噶台並轄  
軍馬為第三千戶實沙受命己丑從太宗南征有功庶  
寅帝命與薩里台東征收其父遺民移鎮廣寧府行廣  
寧路都元帥府事自庚寅至丁酉連征高麗東夏萬奴  
國復戶六千有奇戊戌實沙卒子壽果奴襲爵行廣寧

府路總管軍民萬戶府事易名實嘯征高麗有功辛亥  
睿宗命佐諸王伊克及扎拉台控制高麗己未卒長子  
古納嗣中統元年征河西三年征李璫破嶧山以功皆  
受賞至元六年朝廷併廣寧於東京去職是歲卒子特  
格實沙弟善格賜名蒙古岱命從親王昆布哈己丑從  
攻破天城堡鳳翔府以功襲克巴圖爾壬辰引兵三千  
會大軍平金後伐宋拔光州棗陽由千戶遷廣寧尹至  
元元年卒子天祐襲廣寧千戶改廣寧縣尹

耶律阿哈遼故族也金桓州尹實巴爾之孫尚書奏事  
官圖卜德勒之子也金季遣使王汗見太祖姿貌異常  
因言金國不治戎備亡可立待帝喜曰汝肯臣我以何  
為信阿哈曰願以子弟為質明年復出使與弟托噶俱  
往遂以為質直宿衛阿哈參預機謀常在左右歲壬戌  
王汗叛盟謀襲太祖太祖與宗親大臣同休戚者飲河  
水為盟阿哈兄弟預焉既敗王汗金人訝其使久不還  
拘家屬於瀛阿哈殊不介意攻戰愈厲帝妻以貴臣之

女給戶俾食其賦癸亥進攻西夏諸國累有功丙寅帝  
即位勅左帥薩巴略地漢南阿哈為先鋒辛未破烏沙  
堡鏖戰宣平大捷澮河遂出居庸耀兵燕北癸酉拔宣  
德德興乘勝次北口薩巴攻下紫荆關阿哈奏曰興創  
之始願止殺掠以應天心帝嘉納焉遂分兵略燕南山  
東諸郡還駐燕之近郊金主懼請和諭使道阿哈妻子  
來歸師還出塞甲戌金人走汴阿哈以功拜太師行中  
書省事封托噶為太傅濮國公命托噶從穆呼哩取中

原阿哈從帝攻西域下布哈塔實干等城留監塔實干  
專任撫綏之責未幾卒至元十年追封忠武公子三人  
長蒙古台次穆蘇格爾次聶爾科蒙古台在太祖時為  
御史大夫管領契丹漢軍守中都招安水泊等處卒無  
子聶爾科在太祖時為右丞行省遼東萬努叛舉家遇  
害穆蘇格爾襲太師監塔實干城久之請還內郡守中  
都路伊克達嚕噶齊卒子邁格太祖時為奉御襲父中  
都之職戊午從攻蜀師次釣魚山卒於軍妻伊喇氏以

哀毀卒特贈貞靜子七人里瑪備宿衛為筆且齊仕至右衛親軍都指揮使至元二十五年戊哈達圖有戰功

耶律托噶契丹人世居桓州太祖時率衆來歸後隨太祖同飲班珠爾河水從伐金大破呼齊呼軍又從穆呼哩叔山東河北有功拜太傅總領伊克諾延封濮國公統萬戶扎拉爾劉黑馬史天澤伐金卒於西河州子珠格嗣仍統劉黑馬等七萬戶與都元帥塔海幹布同征四川卒於軍子保通嗣以疾不任事珠格弟邁珠嗣而

以保通充隨路新軍總管邁珠言於憲宗曰欲略定西  
川當先定成都以為根本帝從之命率諸軍往成都攻  
嘉定未下而卒子和爾岱嗣總諸軍立成都府卒於軍  
以兄百嘉努嗣自珠格至百嘉努並襲太傅總領伊克  
諾延圖們岱爾者百嘉努之弟和爾岱之兄也常留中  
宿衛後百嘉努解兵柄為他官乃授成都管軍萬戶代  
將其軍至元十一年從呼敦攻嘉定修平康寨以守之  
十二年從汪良臣

按原傳作從汪特格考特格傳特格  
以憲宗九年死於釣魚山之戰其弟

欽定四庫全書

卷四百五十六

良臣於至元十一年進攻嘉定  
振此則為良臣無疑今改正

攻九頂山破之嘉定降

從呼敦徇瀘叙諸城圍重慶守合江口又以舟師塞龍  
門濠遏其援兵十三年瀘州叛從汪良臣攻之重慶遣  
兵援瀘擊破之瀘堅守不下夜率兵攻水城以進黎明  
先登克之復從布哈圍重慶守將張珏搏戰敗之城下  
重慶降授夔州招討使累遷四川等處行尚書省右丞  
卒蒙古岱保通子也世祖時襲父職為隨路新軍總管  
統領山西兩路新軍從行省伊蘇岱爾征蜀及思播建



都諸蠻夷有功陞萬戶從攻羅必甸至雲南詔以其衆入緬迎雲南王時諸蠻往往伏險要為備蒙古益擊破之凡十餘戰至緬境開金齒道奉王以還遷副都元帥從諸王阿勒台征交趾至白鶴江與交趾偽昭文王戰奪其戰艦又從雲南王攻羅必甸破之二十九年入覲成宗即位授烏撒烏蒙等處宣慰使兼管軍萬戶遷大理金齒等處宣慰使都元帥六年烏撒羅羅斯叛率師討平之九年討叛賊阿瑱擒殺之遷授雲南諸路行中

書省左丞行大理金齒等處宣慰使都元帥卒於軍至  
大四年追封濮國公諡威愍子和尼齊襲萬戶

伊喇聶呼契丹人也沈毅多謀略金以為參議留守等  
官皆辭不受聞太祖舉兵詣軍門獻十策帝與語奇之  
賜名賽音筆且齊又因其生霸州號為霸州元帥乙亥  
拜兵馬都元帥佐太師穆呼哩取北京下高利興松義  
錦等二十六城破五十四寨平利州賊劉四祿及錦州  
賊張致兵勢方熾且盜名號穆呼哩命聶呼與大將烏

頁爾等合兵討之聶呼出奇兵掩擊斬致

按穆呼哩傳云致將高益

緝致出降伏誅與本傳異

第功遷兵馬都提控元帥繼取遼東西廣

寧金復海蓋等城興州監州綽爾反復與烏頁爾討平之戊寅從攻東平辛巳從攻延安壬午從圍鳳翔先登殺數十人臂中流矢裹創進攻丹延穆呼哩止之對曰創未至死敢自愛耶穆呼哩壯之與所乘白馬明日介其馬飾以朱纓簡驍衛七十人與金兵戰穆呼哩乘高見其馳突萬衆中曰此霸州元帥也諸軍繼進金兵敗

走丹延十餘城皆降遷軍民都達嚕噶齊都提控元帥兼興勝府尹癸未從帝征河西取甘合辛蛇等州師還從攻益都下萊膠淄等三十二城戊子得疾歸高州卒追封興國公諡武毅子邁努

邁努蚤從父習戰陣初入見太祖曰此兒甚肖乃父以為高州等處達嚕噶齊兼征行萬戶庚寅命攻高麗花涼城監軍張翼劉霸都殞於敵邁努怒曰兩將陷賊義不獨生力戰破之進攻開州州將金寶默逆戰擒之遂

下龍宣雲泰等十四城癸巳從諸王阿齊台征女真有  
功未幾召還興州趙祚反土豪揚買驢等附之帝命從  
親王察罕台討之斬賊將董蠻等圍買驢於險樹寨邁  
努令健卒即寨北小徑上大樹以繩潛引百人登寨直

前置驢投崖死餘黨悉平

按太宗紀癸巳係太宗五年  
下文乙未則太宗七年也原

文於此處誤入太宗  
即位四字今刪正

乙未從征高麗入王京取其西京

而還加征東大元帥復命出師高麗將行以疾卒追封

興國公諡顯懿子元臣

元臣別名哈喇哈斯年十六入宿衛應對進止有度世祖謂丞相和爾果斯曰此勲臣子非凡器也以為集賢筆且齊襲千戶將其父軍從伐宋攻淮西戍清口取瓜洲下通泰累有功至元十二年從丞相巴延平宋進中衛親軍總管十四年珠爾噶岱叛圍應昌府時皇女魯國公主在圍中元臣以所部軍擊之擒珠爾噶岱公主賜賚甚厚奏請留元臣鎮應昌以安反側居鎮四載召還京師二十二年進同僉江淮行樞密院事行院罷歸

高州帝親征納顏元臣率家僮五十人見行在所願效

前驅二十八年

原傳誤作八年顯係脫文今補正

移僉湖廣行樞密院

喻降溪洞苑容等州蠻獠三十年卒於官追封興國公

諡忠靖子迪湖廣宣慰使都元帥

王珣字君寶本姓耶律氏世為遼大族金正隆末契丹

幹罕叛祖成從母氏避難遼西更姓王氏遂為義州開

義人父伯俊伯父伯亨無子以珣為後河朔兵動豪強

各擁衆據地珣慨然曰世故如此大丈夫當自振拔否

則為人所制乃召諸鄉人諭以保親族之計衆從之推  
珣為長招集遺民至十餘萬歲乙亥太師穆呼哩略地  
奚嘗珣出迎承制以珣為元帥兼領義川二州事丙子  
張致僭號錦州陰結揚伯傑等來掠義州珣出戰伯傑  
引去會致兄子以千騎來衝珣選十八騎突其前復令  
左右犄角之其衆潰走時興中亦叛穆呼哩圍之召珣  
以全軍來會致覘其虛夜襲之家人皆遇害及興中平  
珣無所歸穆呼哩留之興中遣其子榮祖馳奏帝諭之



曰俟逆黨平彼之族屬城邑人民一以付汝父子世為  
大官珣以穆呼哩兵復開義擒伯傑等殺之進攻錦州  
致部將高孟縛致妻子及其黨千餘人以獻穆呼哩悉  
以付珣珣但誅致家餘皆釋之始還義州丁丑入朝加  
兵馬都元帥鎮遼東便宜行事兼義川等州節度使從  
穆呼哩略山東至滿城令還鎮以子榮祖代領其衆甲  
申卒子四人榮祖襲

榮祖字敬先珣卒襲宗義軍節度使義州管內觀察使

從嗣國王博羅入朝帝聞其勇選力士三人送與之搏  
皆應手而倒欲留置宿衛會金平章政事葛布格行省  
於遼東咸平路宣撫使布希萬努僭號於開元遂命榮  
祖還副薩里台進討之拔益州宣城等十餘城葛布格  
走死金帥郭琛據石城復攻拔之方城未下時榮祖遣  
卒賈實穴其城城崩實被壓衆謂已死弗顧也榮祖曰  
士忘身死國安忍棄去發石取之猶生一軍感激樂為  
效死有言義人懷反側者薩里台將屠之榮祖馳驛奏

辨事乃止已丑授北京等路征行萬戶伐高麗圍其王

京高麗王遣其兄懷安公

按高麗傳云遣其弟懷安公王使請和本傳作其兄未知

孰是奉表納貢進討萬努擒之趙祁以興州叛從諸王阿

齊台平之祁黨猶剽掠景薊間復從大將唐古特討之

將行榮祖請無戮無辜唐古特然之由是免死者衆再

從征高麗破十餘城高麗遣子緯入質又從諸王雅勤

呼略地三韓降天龍諸堡皆禁暴掠民悅服之破五里

山城請於主將全其民遂下甕子城竹林寨苦古數島

帝嘉其功官其子興為千戶仍賞其部曲移鎮高麗平壤

榮祖乃募民屯戍闢地千里盡得諸島嶼城壘高麗遣

其世子僉出降遂以僉入朝

經世大典作  
中統元年事

中統元年詔

榮祖詣闕進沿邊招討使兼北征等路征行萬戶還鎮

以病卒子十三人通泰興遇達廷璉皆著任籍

舒穆魯額森

穆呼哩傳作蕭額森按舒穆魯額森舊作  
石林也先別卷又有石林阿辛傳其家世

事跡大畧相同顯係  
重出今刪彼存此

遼人也其先嘗從蕭后舉族入突

厥及后還而族留為舒魯氏號稱后族遼亡改舒魯氏

為舒穆魯氏其祖招呼勒誓不食金祿率部落遠徙父  
推勒博奇爾亦不仕有子五人額森其仲子也年十歲  
從其父問宗國之所以亡即憤曰兒能復之及長勇力  
過人多智略金人聞其名徵為奚部長即讓其兄實特  
訥曰兄姑受之為保宗族計遂匿居北野山聞太祖起  
朔方匹馬來歸首言東京為金開基之地蕩其根本中  
原可傳檄而定太祖悅命從太師國王穆呼哩取東京  
穆呼哩令率千騎為先鋒額森曰兵貴奇勝何以多為

謀知金人新易東京留守將至額森從數騎邀殺之懷其所受誥命至東京謂守者曰我新留守也入據府中問列兵於城何謂吏以邊備對額森曰吾自朝廷來中外晏然奈何陳兵以動搖人心即命撤之下令易置其將佐部伍三日穆呼哩至入東京不費一矢得地數千里定城邑三十二金人喪其根本之地始議遷河南歲乙亥移師圍北京城久不下及城破將屠之額森曰既降而屠之則未下者將死守天下何時定乎因以上聞

赦之授御史大夫領北京達嚕噶齊時石天應據興中  
府額森分兵降之尋奉命監張鯨等軍征燕南未下州  
郡至平州鯨稱疾不進額森執鯨送行在所帝責之鯨  
曰臣實病非敢叛帝曰今呼汝弟致為質當活汝鯨諾  
而宵遁額森追戮之致已殺使者應其兄矣致既伏誅  
額森以御史大夫提控諸路元帥府事後從穆呼哩攻  
蠡州北城先登中石死子四人曰扎拉曰錫錫曰博羅  
曰喀爾扎拉襲御史大夫戊寅從穆呼哩攻平陽太原

諸郡下之遂攻益都久不下及降衆欲屠其城扎拉曰  
殺降不祥遂免己卯從南征敗金將博索官努于河渡  
河再戰盡殺之長馳破汴京入自仁和門收圖籍而還  
癸巳從國王塔斯攻金南京先登衆軍從之而進遂克  
之辛丑太宗嘉其功授真定北京兩路達魯噶齊癸卯  
卒於柳城子庫魯默襲職中統三年從征李璫中流矢  
卒子良輔襲至元十七年以功累陞沿海副都元帥二  
十一年改沿海上副萬戶大德十一年告老子繼祖襲



萬戶錫錫之子都呼攻樊城戰死

舒穆魯明安桓州人歲壬申太祖破金撫州將南向金

主命招討赫舍哩糾堅

續通鑑作  
完顏糾堅

來援時明安在其麾下

下臨陣策馬來降命領蒙古軍撫定雲中東西兩路既  
而帝欲休兵於北明安諫曰金有一十七路今我所得  
惟雲中東西兩路而已若置不問待彼併力而來則難  
敵矣今以重兵臨之傳檄可定帝從之即命引兵南進  
所至民皆迎降盡有河北諸郡而還帝復命明安及僧

格巴圖將兵徇景薊擅順諸州諸將欲屠之明安奏曰  
此輩當死今若生之則未附者皆聞風自至矣帝從之  
乙亥取通州金右副元帥富察齊錦衆降明安命復其  
職置之麾下遂駐軍於京南建春宮金御史中丞李英  
等領兵護軍食以援中都帝遣右副元帥實沙迎戰明  
安將五百騎繼之遇於永清佯敗金兵來追迴擊大破  
之獲李英得糧千餘車遂招諭永清不降拔而屠之金  
將完顏和卓監軍阿星宗噶爾復以步軍萬二千人援

中都明安將三千騎擊之過於涿州宣封寨獲阿星宗  
噶爾和卓遁去盡得其輜重還屯建春宮攻萬寧宮克  
之取富昌豐宜二關拔固安縣將攻中都金相完顏福  
興飲藥死城中官民開門請降明安悉令安業仍以粟  
賑之衆皆感悅明安早從軍旅料敵制勝算無遺策嘗  
與士卒同甘苦所得府庫金玉悉具其數上進未嘗有  
纖毫私中都既下加太傅邵國公兼管蒙古漢軍兵馬  
都元帥丙子以疾卒於燕城子二人長軒達布襲職為

燕京行省次呼圖克華燕京等處行尚書省事兼蒙古  
漢軍兵馬都元帥

欽定續通志卷四百五十六

欽定四庫全書

欽定續通志卷四百五十七

列傳

元十一

何伯祥

瑋

李守賢

何實

郝哈尚巴圖

趙璠

秉溫

張榮

劉亨安

張子良

懋

齊榮顯

石天祿

劉斌 思敬

何伯祥易州易縣人幼從軍於金從張柔來歸太祖定河朔保定王子昌信安張進堅守不下子昌金驍將也柔命伯祥逼其城子昌出走追及之子昌反射中手貫槍伯祥拔矢棄槍策馬直前徒手搏之擒子昌進聞之遁去遂平西山諸寨後攻汴梁拔洛陽圍歸德破蔡州論功居多授易州等處軍民總管丁酉從主帥察罕伐

宋伯祥拔三十餘柵獲戰艦千餘又破芭蕉望鄉大洪  
張家等寨俘獲甚衆士子諸軍入宋境察罕自他道遽  
還諸軍倉皇失措伯祥率兵突戰直抵司空寨疏布營  
壘為攻取勢既夜命為五營營火十炬伏精銳於營側  
天將明命士卒速行而鳴鼓其後宋兵果來追伏發礮  
潰追擊破之他軍皆賴以出世祖南伐伯祥參預軍事  
多獻納卒於軍追封易國公諡武昌子瑋

瑋始習父職知易州兄行軍千戶卒瑋復襲之鎮亳州

從圍襄樊宋將夏貴率舟師來救瑋時建營於城東北  
貴兵縱火焚北闕瑋率衆死戰開營門以身先之貴敗  
走至元十一年丞相巴延受命伐宋辟瑋為帳前都鎮  
撫師次陽羅堡夏貴率戰艦列江上下瑋從元帥阿珠  
率衆先渡諸軍繼之貴復敗走宋丞相賈似道率舟師  
拒於丁家洲瑋將勇敢士出戰奪舟千餘似道遁去授  
管軍總管宋既平進太平路軍民達嚕噶齊累遷湖南  
宣慰使三十一年拜中書參知政事時宰執凡十一人



按宰相年表至元三十一年自鄂勒哲而下凡十二人  
人其一則是年十一月勅增也故本傳祇云十一人

曰古者一相專任賢也今政出多門轉相疑忌請損之

不從遂乞代大德四年授侍御史以母病辭七年授御

史中丞京師孔子廟成瑋言唐虞三代國都閭巷莫不

有學今孔廟既成宜建國學於其側從之賽音諤德齊

已圖果勒等

已圖果勒宰相年表作已特瑪琳沁

還自貶所復相瑋言姦

黨不可復用宜選正人以居廟堂帝深然之監察御史

郭章劾郎中哈喇哈斯受贓具服而哈喇哈斯密結權

要以枉問誣章瑋率臺臣入奏辨論剴切章遂得釋成  
宗崩丞相阿固台奉皇后旨集廷臣議祔廟及攝政事  
瑋難之阿固台曰中丞獨不畏死耶瑋從容曰死畏不  
義耳苟死於義夫復何畏未幾以疾去位武宗即位於  
上都臨朝問孰為何中丞瑋出拜帝曰朕知卿能以忠  
直為國朕有不逮卿當勉輔至大元年擢河南行省平  
章政事提調屯田事帝面諭曰汴省事重屯田久廢卿  
當為國竭力瑋至汴建諸葛亮祠立書院三年改河南

行尚書省平章政事卒追封梁國公諡文正

李守賢字才叔大寧義州人祖小字放軍嘗從金將攻

宋淮南有功金大安初守賢暨兄庭植弟守正守忠從

兄伯通伯溫

按伯溫傳以伯溫為守賢毅之子蓋因傳末毅子十一人伯溫見忠義傳二語相連

而誤也至以守正為伯溫之子則尤與此不符矣

歸款於太師國王穆呼哩朝

太祖於行在所即命庭植為右副元帥崇義軍節度使

守賢授錦州臨海軍節度觀察使弟守忠為都元帥守

河東朝廷以金晉為要害之地人心未定遷守賢為河

東南路兵馬都總管歲戊子朝於和琳知平陽府事兼  
本路兵馬都總管辛卯平陽當移粟萬石輸雲中守賢  
奏以百姓疲敝不任輓載帝納之時河中未下守賢請  
自北面鑿城先登如其言城果下明年破趙雄兵於芮  
城時方會師圍汴留守賢屯嵩汝金兵十餘萬保太平  
寨癸巳正月望夕延壽擊毬為嬉守賢潛遣輕捷者數  
十人緣崖以登殺其守卒遂縱兵入破之不兩旬諸寨  
望風俱下未嘗妄殺一人及攻河南其渠魁強元帥及

秦藍帥王祐以次來降關東洛西遂定甲午冬卒子穀  
嗣歲丁酉從太師塔海幹布征蜀漢有功明年攻碉門  
又明年征萬州會戰於瞿塘獲戰艦千餘艘辛丑朝行  
在所授河東道行軍萬戶兼總管乙巳攻成都蜀之餘  
孽團聚為梗穀銜枚疾進賊兵敗走長驅至成都破之  
戊午秋憲宗南伐己未入梁州師次江上造船為梁以  
通援兵會江漲梁絕宋將率舟師萬艘逆戰穀以一旅  
先犯之諸軍繼進遂破之明日帝召謂諸將曰汝輩自

負鷲勇及臨敵不能立尺寸功獨李穀摧鋒陷陣視敵蔑如言勇者如穀乃可耳中統三年改河東路總管未幾轉洺磁路至元七年卒子十一人伯溫見忠義傳

何實字誠卿其先北京人曾祖搏霄以善人稱祖昂敬父道忠任金為北京留守實少孤依叔父居及長驍勇善騎射歲乙亥中原盜起錦州張鯨自立為臨海郡王遣使納款於太祖尋以叛伏誅鯨弟致初以叛謀於實實厲聲叱責之丙子春來歸大將穆呼哩與論兵事奇

變百出大加稱賞遂引見太祖獻軍民之數帝大悅命  
從穆呼哩充前鋒時張致復據錦州實與遇於神水挺  
身陷陣殺獲甚衆穆呼哩奏為帳前軍馬都彈壓丁丑  
穆呼哩東下齊數郡使實取燕南齊西之地擊邢州徇  
趙郡取魏鄴下博關襲曹濮恩德泰安濟寧勢如破竹  
薄濰州與穆呼哩會遷兵馬都鎮撫從取大同鴈門等  
州引兵掠太原平陽諸城所向款附錄功授元帥左監  
軍癸未穆呼哩卒子博囉嗣武仙復叛據邢州實帥師

圍之城破武仙走逐北四十里下令禁止剽掠軍民肅然士民按堵博囉命戍邢多著善政邢民敬之如神明甲申博囉征西夏以實分兵攻汴陳蔡諸州邑所至有功博囉復命駐兵邢州丁亥命便宜行元帥府事乙未博囉以其子仲為質子丁酉太宗召入見朝於幄殿帝歡甚賜坐與論軍中故事曰卿效力有年朕欲授以征行元帥後當重任實叩頭謝曰小臣從事鋒鏑二十餘年身被十餘創右臂不能舉已為廢人不敢辱命帝不



悅命入宿衛密使人覘之實臂果不能舉固辭十餘始  
可其奏充御用局人匠達嚕噶齊子孫世其爵丁巳卒  
於官子九人孫十七人

郝哈尚巴圖太原人以小字行幼為蒙古兵所掠在郡  
王奇塔特麾下長通譯語善騎射太祖遣使宋往返數  
四以辯稱歲戊子以為九原府主帥庚寅率兵南伐略  
地潼陝有功辛卯授行軍千戶乙未從皇子南伐至襄  
陽宋兵逆戰領先鋒數百人直前衝其陣宋兵潰丙申

從都元帥塔海征蜀下興元宋將王連以重兵守劔閣  
乃募敢死士十二人乘夜破闕入蜀諸城悉下明年取  
夔府抵大江宋兵軍於南岸郝哈尚已圖乘輕舸先登  
橫馳陣中宋兵不能支由是以善戰名庚子太宗嘉其  
勞拜宣德西京太原平陽延安五路萬戶甲辰朝定宗  
於行宮

按本紀定宗即位  
在丙午歲此稱甲辰則六  
皇后稱制時也

戊申奉詔還治

太原己酉升萬戶為行省得便宜從事凡四年壬子卒  
追贈冀國公諡忠定子十二人天益仲威天舉天祐天

澤天麟天挺俱以仕顯

趙璿雲中蔚州人父昆仕金為帥府評事兄珪以萬戶  
守飛狐城歲庚午昆卒珪輦其母如蠡州留璿於飛狐  
癸酉太祖南伐璿詣縣曰大兵壓境不降何待衆從之  
丁丑太師國王穆呼哩駐兵桓州署為百戶從攻蠡州  
金兵閉城拒守國王裨將舒穆魯額森戰死王怒將屠  
其城璿泣曰母與兄在城中乞以身贖一城之命哀懇  
切至國王義而許之從攻相州流矢中鼻鏃出腦後拔

矢再戰七日破其城論功授冀州行軍都元帥璿讓其  
兄珪朝廷從之改授璿軍民總管遷易州達魯噶齊太  
宗下河南璿自易州輸矢二十餘萬至行在帝喜命權  
中都省事癸巳趙陽據興州叛璿平之遷中山真定二  
路達魯噶齊中統元年授順天宣慰使至元十四年遷  
河南道提刑按察使十六年致仕明年卒皇慶元年追  
封定國公諡襄穆子秉溫

秉溫事世祖於潛邸從征吐蕃雲南大理中統初詔行

右三部事至元七年創習朝儀閱試稱旨授尚書禮部

侍郎知侍儀司事

按禮樂志立侍儀司授  
趙秉溫職在至元八年

明年授秘書

少監購求天下秘書十九年遷昭文館大學士知太史  
院侍儀司事二十九年編國朝集禮成帝特命其子慧  
襲侍儀使皇慶元年贈雲國公諡文昭子慧任至昭文  
館大學士

張榮字世輝濟南歷城人嘗從軍為流矢貫背拔之不  
出令人以足抵其額而拔之神色自若金季山東羣盜

蜂起榮率鄉民據南嶺堂嶺衆稍盛遂畧章邱鄒平淄川等地而有之歲丙戌東平順天皆內屬榮遂舉其兵與地納款於阿齊台諾延引見太祖授山東行省尚書省兼兵馬都元帥知濟南府事庚寅朝廷議取汴榮請先六軍以清蹕道帝嘉之詔位諸侯上辛郊軍至河上榮率死士宵濟守者潰詰旦敵整陣至榮馳之望風披靡奪戰船以濟師衆軍繼進破張盤二山寨俘獲萬餘大將額蘇倫欲盡殺之榮力爭而止癸巳汴梁下從額

蘇倫為先鋒攻睢陽議欲殺所獲俘烹其油以灌城又  
力止之既而城下榮單騎先入撫其民甲午攻沛沛守  
將蘇克夜來搆營榮擊殺之乘勝破其城就攻徐州亦  
破之守將國用安赴水死乙未拔邳州丙申從諸王庫  
騰破宋棗陽仇城等三縣時河南民徙至濟南榮令  
民間分屋與地居之俾得樹畜曠野闢為樂土是歲中  
書考績為天下第一世祖即位封濟南公致任卒子七  
人邦傑邦直邦彥邦允邦孚邦昌邦憲孫四十人

劉亨安其先范陽人後遷遼東川州初國王穆呼哩經  
略遼東兄世英率宗族鄉人隸麾下分兵收燕趙雲朔  
河東以功充行軍副總管庚辰世英言於國王曰自古  
建國以民為本今河東殺掠殆盡異日我師復來孰給  
轉輸收存恤亡此其時也王善之奏授世英絳州節度  
使兼行帥府事卒於師無子國王博羅命其族兄德仁  
襲職丙戌金將伊喇副樞攻絳州城陷死之穆呼哩承  
制命亨安領其眾奏授絳州節度使行元帥府事兼觀



察使庚寅冬從王師渡河入關辛卯克鳳翔歷秦隴屯  
渭陽出階城沿漢抵郿壬辰會大軍於鈞州敗金人於  
三峰山甲午宋兵攻汴將趨洛都元帥塔濟爾使享安  
拒之與宋軍遇於龍門北橫梁躍馬奮突而前宋師奔

潰丙申都元帥塔爾海征巴蜀

按太宗紀八年丙申皇  
子庫騰入成都至塔爾

海征蜀則在六年  
甲午與此互異

攻散闕破劍門出奇制勝戰功居多

進圍成都享安為先鋒大破之於城西生擒宋將陳侍  
郎有喬長官與享安爭功及攻城喬為砲所傷享安負

之以出喬感愧身安從軍十年累著勲伐所獲金帛悉推與將佐故士卒咸樂為用癸卯卒子貞嗣職孫三人弘彊醇

張子良字漢臣涿州范陽人金末四方兵起所在募兵自保子良率千餘人入燕薊間聚舟人阻水治舟筏取蒲魚自給子良部勒定興新城數萬口就食東平東平守棄東平還汴檄子良南屯宿州又屯壽州夏全劫其民出難口子良走歸宿因以宿帥之眾奪全所劫以還

全怒連徐邨之軍來攻子良與宿帥斫其營全走死揚  
州時全受重圍於汴聲援盡絕國用安圖以漣水之衆  
入援道阻游兵不能進子良與一偏將晝伏夜行得入  
汴達用安意金君臣曲賜勞來凡所欲皆如用安請因  
以徐宿授子良總管陝西東路兵馬仍治宿州時令已  
不行於陝而用安亦卒不得志徐宿之間民無食者出  
城拾糶穢以食子良嚴兵護之以防鈔掠猝遇敵子良  
被重傷乃率其衆就食泗州泗守閱兵將圖之子良與

麾下十數人即軍中生縛其守歲戌戌率泗州西城二十五縣因元帥阿珠來歸太宗命為東路都總帥升京東路行尚書省兼都總帥管領原附軍民至元七年

原文

脫至元二字今增

大名路總管兼府尹八年卒追封清河郡侯

諡翼敏子懋

懋字之美侍子良官京東領其衆從丞相阿珠軍立歸德府以其軍鎮之至元七年擢濟南諸路新軍千戶十一年丞相巴延南征其行陣以鐔車弩為先衆軍繼之

懋以勇鷲將埒前行凡所過山川道路險陬通梁筏平  
塹穿安營設伏出納奇計已延信用之擢為省都鎮撫  
師壓臨安滅宋命懋往諭淮西夏貴貴出迎設賓禮懋  
示逆順禍福辭旨雄厲貴頓首上地圖馳還報已延大  
喜復令徇鎮東安豐壽春懷遠等州郡皆下之錄功授  
泗州安撫司達魯噶齊十六年改吉州路總管郡萬戶  
蘇良恃勢為暴為之翼者有十虎之目民甚苦之乃上  
其實於憲府盡誅十虎奪良虎符而出之民大悅有羣

盜白晝劫城懋聞之率從騎擣其穴縛其酋長以歸民  
之流亡與遠郡之未歸者數千家十七年卒追封清河  
郡侯謚宣敏

齊榮顯字仁卿聊城人父旺金同知山東西路兵馬都  
總管榮顯幼聰悟九歲代父任千戶從外舅嚴實來歸  
屢立戰功攻濠州宋兵背城為陳榮顯薄之所向披靡  
其屬王孝忠力戰中鉤戰榮顯斷戟拔孝忠出復逐北  
入其郭而還兵趨五河口抵大堤榮顯偕數騎前行覘

敵值邏騎數十從者將退走榮顯曰彼衆我寡若示以  
怯必為所乘援弓策馬射殺兩人乃還進拔五河口升  
權行軍萬戶守宿州墮馬傷股不能復從軍改提領本  
路課稅又改本路諸軍鎮撫兼提控經歷司值斷事官  
鈎校諸路積逋官吏往往遭詬辱榮顯從容辦理悉為  
蠲貸從實入朝授東平路總管府參議兼領博州防禦  
使時攻淮南道出東平民間供給不貲榮顯詣斷事官懇之  
得折充賦稅民賴以不困中統初謁告侍親闋居十年卒

石天祿父珪山東諸路都元帥陷金死節天祿襲爵博  
羅承制授東平路元帥時宋將彭義斌取大名及中山  
天祿與布爾罕率兵敗之獲義斌又敗金將武仙屢立  
戰功壬辰皇太弟圖類南渡河天祿為前鋒夜至歸德  
城下襲其營殺三百餘人金將追圍天祿天祿潰圍復  
戰金兵退走提兵掠亳及徐所過望風降附癸巳歸德  
降甲午入覲改授征行千戶濟兗單三州管民總管乙  
未從扎拉衮和爾濟渡淮攻隨州至襄陽夾河寨戰退



宋兵又從攻蘄黃時詔天祿括戶東平軍民賦稅並依  
天祿已括籍冊嚴責不得科收旋以病不任職以子興  
祖襲明年卒子十人興祖襲千戶己未從伐宋攻鄂州  
至元四年繇宿州率兵抄沿淮諸郡獲宋覘伺者十餘  
輩十二年攻常州功在諸將上升管軍總管戍溫州土  
賊林大年等搆亂出兵圍之斬首千餘級招輯南溪山  
寨歸農者三萬餘戶十九年卒

劉斌濟南歷城縣人從濟南張榮起兵為管軍千戶以

功授中翼都統攻睢陽軍軍杏堆距陳州七十里聞陳  
整軍於近郊斌率眾夜破之又擊走太康守兵擒其將  
三日太康陷移屯襄陽軍乏食斌知青陵多積穀前阻  
大澤水深不可涉曰彼恃險不我虞取可必也乃率百  
騎夜發獲敵人使道之行遇敵兵捨馬揮槊突敵敗之  
得其糧數千斛遷官知中外諸軍事從攻六安先登破  
其城累官濟南新舊軍萬戶移鎮邳州宋將憚之病作  
戒其子曰居官當廉正自守毋贖貨以喪身家卒贈彭

城郡公謚武莊子思敬

思敬賜名哈巴爾圖襲父職為征行千戶世祖南征從董文炳攻臺山寨先登中流矢傷甚帝親勞賜酒累授西川副統軍至元九年宋嘉定守臣咎萬壽乘虛攻成都哈巴爾圖邀擊敗之戰於青城奪所俘二千人還十二年攻嘉定取之瀘叙忠涪諸郡及壽勝龜雲石筍等寨十九族西南夷五十六部悉來降十三年瀘州復叛哈巴爾圖妻子沒焉乃率兵討之擒其將任慶攻破盤

山寨俘九千餘戶遂復瀘州十六年蜀平拜四川行省

參知政事十七年授江西行省參知政事二十年卒追

封瀕國公諡忠肅子思恭

按裕宗珍戡傳載參政劉思敬遣其弟思恭以民戶來獻

裕宗曰歸語汝兄云云則思恭乃思敬弟也本傳疑有錯簡

右衛親軍都指揮使思

義昌國洲軍民達魯噶齊

欽定續通志卷四百五十七

欽定四庫全書

史部

欽定續通志卷四百

五十五  
六十三

編修<sub>臣</sub>謝振定覆勘

總校官原任侍講<sub>臣</sub>王燕緒

欽定四庫全書

欽定續通志卷四百五十八

列傳

元十二

薛塔喇海

高諾爾

王義

王玉忱

趙迪

邱順琮

王善慶瑞

杜豐

舒穆魯拜達勒

賈塔喇琿

鄂屯世英

田雄

張巴圖

張榮

趙天錫 賁亨

薛塔喇海燕人也歲甲戌太祖引兵至北口塔喇海帥所部來歸命為礮水手元帥屢有功進礮手軍民諸色人匠都元帥從征回回河西欽察輝和爾諸國俱以礮立功太宗三年睿宗引兵自洛陽渡河塔喇海由隴右

假道金商遂會師於鈞州三峯山敗金師四年破南京  
唐鄧鈞許諸州取鄢陵扶溝卒子達實拉襲為都元帥  
南攻江淮有功弟結桑憲宗八年從世祖攻鈞魚山苦  
竹崖大林平青居山破重慶馬湖天水中統三年李璫  
叛濟南又以礮破其城至元五年從圍襄陽卒丞相阿  
珠欲以千戶劉添喜攝帥府事子肆嘉努年十六請從  
軍自効帝壯而許之八年始襲父爵十年襄樊未下肆  
嘉努立礮攻之明年正月

世祖紀作至元十年二月事

襄陽守呂文



煥降繼從丞相已延南伐自鄭州下沿海諸城堡至建  
康十二年與宋將夏竦戰於峪溪口奪其船二百餘艘  
屠常州取蘇州十三年圍揚州宋將李庭芝棄城走追  
獲之將兵平浙東諸郡從征福建灤江與宋兵力戰破  
之十六年鎮揚州後改為萬戶

高諾爾女真人事太祖從征西域復從庫春太子察罕  
諾延連歲出征累功授總管管領山前十路匠軍歲已  
未憲宗憫其老命子元長襲從世祖渡江攻鄂還鎮隨

州至元五年從元帥阿珠修立白河口新城鹿門山等處城堡圍襄樊七年充季陽軍馬總管十一年從渡江鼓戰艦上流與宋人戰殺三百餘人十二年進兵丁家洲與孫虎臣等大戰殺五百餘人又敗夏貴於焦湖從征常州先登又攻杭州二十一年從太子托歡征交趾追襲交趾世子於大海口奪其戰艦以還二十三年升季陽萬戶復以兵追襲交趾世子於海之三叉口與敵軍合戰中毒矢卒子默爾根襲父職領兵鎮廣東移戍

惠州平盜譚大獠朱珍等元貞元年移戍袁州盜陀頭以衆犯境悉勦除之尋廣之南恩盜起復平之還沒於

袁州

王義字宜之真定寧晉人金人還汴河朔盜起縣人聚而謀曰時事如此吾儕欲保全家室宜有所統屬乃推義攝行縣事太師國王穆呼哩兵至城下義以寧晉歸即投為令兼趙州以南招撫使是時兵亂民廢農耕寧晉東有藪澤百餘里中有堡曰瀝城義曰瀝城雖小而

完且有魚藕菱芡之利不可失也留偏將李直守寧晉  
身率衆保瀝城由是全活者衆歲乙亥金將李伯祥據  
趙州穆呼哩遣義擣其城會天大風雨挾長梯疾趨夜  
四鼓齊登殺守陴者城中亂伯祥走天壇寨一州遂定  
丁丑大軍南取鉅鹿洺州還至唐陽遇金監軍納蘭率  
冀州節度使柴茂等將兵萬餘北行義伏兵桑林以百  
騎挑之納蘭迎戰因稍却誘近桑林伏起金兵大亂奔  
還獲納蘭二弟及萬戶李虎戍寅拔東鹿進攻深州守

帥以城降升深州節度使深冀趙三州招撫使金武仙  
以兵四萬攻東鹿義隨機應拒積三十日不能下一夕  
召將佐曰今城守雖有餘然外無援兵食且盡豈可坐  
而待斃乃率精銳銜枚夜出直擣仙營仙軍亂殺數千  
人仙率餘衆遁還真定庚辰拔冀州獲紫茂械送軍前  
上功授武安軍節度使辛巳按太祖紀十五年庚辰武  
仙降二十年乙酉復以真  
定叛與金史武仙傳所載相符本  
傳序謀襲趙州事於辛巳年恐誤  
仙復遣將盧秀李伯  
祥等率兵謀襲趙州并取瀝城率戰艦數百沿江而下

義具舟楫於紀家莊截其下流擊之擒秀伯祥退保澀  
城義引兵拔之伯祥西走邢州盜聚衆數千據任縣固  
城水寨義引兵薄其城一鼓下之餘黨悉平義招集散  
亡勸率衆藝深冀之間並為樂土云

王玉趙州寧晉人金季為萬戶鎮趙州穆呼哩下中原  
王玉率衆來附領本部軍從攻邢洺磁三州及濟南諸郡  
號長漢萬戶從攻潞州不下王玉力戰流矢中左目竟拔  
其城又破平陽下太原汾代等州師還署元帥府監軍

以趙州四十寨隸馬先是武仙既降復叛宋將彭義斌  
在大名陰與仙合玉從史天澤攻敗武仙生擒義斌駐  
軍寧晉東里寨仙遣人賫誥命誘玉妻妻曰妾豈可使  
夫懷二心於國家耶仙圍之數匝殺其子寧壽玉聞之  
領數騎突圍斬獲數百人而還仙遣人追之不敢進皆  
曰王將軍膽氣驍勇我輩非敵也仙乃盡發玉先世家  
玉從諸將擊仙於趙州仙走雙門寨圍之會大風仙脫  
走斬其將四十三人真定平權真定五路萬戶假趙州

慶源軍節度副使中統元年卒子忱

忱字允中幼明敏平章趙壁引見裕宗潛邸命宿衛掌  
錢穀計簿授山北遼東道提刑按察使副使駙馬博和  
哩數田獵蹂民田忱以法繩之憲吏耿熙言徵北京宣  
慰司積年逋負計可得鈔二十萬錠帝遣使覈實熙懼  
事露擅增制語有并打算大小一切諸衙門等事凡十  
二字追繫官吏至數百人忱驗問知其詐熙乃款伏改  
河北河南道提刑按察副使省部以正軍餘田出調發



忱言士卒衝冒寒暑遠涉江海宜加優恤從之劾罷鎮南帥唐古特唐古特結援大臣誣奏於帝繫忱至京師得面陳狀世祖悟抵唐古特罪起忱為燕南河北道肅政廉訪副使至大三年拜雲南行省參知政事未行卒

趙迪真定藁城人幼孤事母孝金末為義軍萬戶郡將出六鈞強弩募能挽者迪能之即署真定尉遷藁城丞太祖兵至迪率眾迎降歲壬午改藁城為永安軍以迪同知節度使事嘗從帝西征迪治軍嚴所過無犯先是

真定既破迪亟入索藁城人在城中者得男女千餘人  
諸將欲分取之迪曰是皆我所掠當以歸我諸將許諾  
迪乃召其人謂曰吾懼若屬為他將所得則分奴之矣  
故索以歸我今縱汝往以各遂生產為良民衆感泣而  
去時兵荒之餘骸骨蔽野迪為大塚收瘞壬子歲卒子  
七人椿齡真定路轉運使

郎順保定行唐人占籍於曲陽縣金末盜起順會諸族  
集鄉人豪壯數百人與其弟常棊兩若分據以守歲甲

戌率衆來歸太宗授行唐令丙子真定饑羣盜據城叛  
順擒殺數百人朝廷升曲陽為恒州以順為安撫使金  
將武仙據真定帥衆來攻順與戰大敗之加恒州等處  
都元帥庚辰武仙屯兵於黃堯兩山順及弟常擊敗之  
時西京邾道章陰結武仙抄掠州縣順擒道章殺之仙  
退真定以自保又從穆呼哩敗之於王柳口以功賜順  
名察納格爾弟常賜名濟農格爾辛卯春從太宗攻河  
南諸郡招降民十餘萬以順知中山府己亥為行軍萬

戶管領諸路元差軍五千人從大軍破歸德府留順成  
之內辰卒子決襲順族弟琮

琮太祖時從行唐元帥常來降歲乙酉金將降武仙復  
據真定叛琮敗之於黃臺癸巳從元帥布展滅金有功  
授管軍總押鎮徐州宋兵入境琮戰却之己亥從大將  
察罕攻滁州力戰中流矢卒子澤襲移鎮潁州宋兵攻  
潁澤戰敗之至元十一年從攻沙洋奪六艦十二年從  
攻潭州及靜江累官郴州總管府達魯噶齊二十八年

移鎮杭州卒

按元文類載姚燧所撰神道碑叙澤戰功頗詳本傳俱畧而不載

王善字子善真定藁城人父增監本縣酒務以孝行稱善多智畧尤精騎射金貞祐播遷田疇荒蕪善求食以奉母乙亥羣盜竄起衆推為長善備禦有方盜不能犯戊寅權中山府治中時武仙鎮真定陰蓄異志忌善威名密令知府李濟府判郭安圖之濟安張宴伏兵召善計事善覺即還治衆倉卒得八十八慷慨與盟人爭自奮遂誅濟安乃諭其黨曰造孽者李郭耳餘無所問善夜

臥城上戒麾下曰勿以我累汝家當取吾首獻帥府衆  
曰公何為出此言我輩惟有効死而已遂率衆來歸授  
同知中山府事是年冬以兵三百攻武仙仙率精銳拒  
戰善擒斬之仙走獲鹿復戰拔之軍勢大振自中山以  
南降州郡四十二遷中山真定等路招討使壬午升藁  
城為匡國軍以善行帥府事癸未太祖紀作  
庚辰年事仙窮迫請  
降詔復還鎮善奏仙狼子野心終必反覆請修城隍備  
之未幾仙果叛率衆來攻火及西門善出戰却之仙自

是不敢入真定壬辰從征河南至鄭州州將馬伯堅素聞善名登陴大呼曰藁城王元帥在軍中否願以城降之善直前免胄與語伯堅率衆出降善令軍中秋毫無犯民皆按堵願從北渡者以萬計授之土田以安集之內申兼河北西路兵馬副都總管後改授知中山府事屬縣新樂地居衝要迎送供給倍於他縣善均其勞逸所徵或未給輒出家貲代輸民德之癸卯卒追封冀國公諡武靖子慶淵為行軍千戶征淮南死次慶端

慶端字正甫初為郡筦庫進水軍提領訓練士卒常如  
臨敵敗李璫於老僧口監築大都城移戍清口宋兵來  
攻守將戰死城欲陷慶端拔刀誓衆裹創力戰城得以  
全羣盜四起復擊走之累遷侍衛軍都指揮使建威武  
營以處衛兵經畫田廬使各安業別立神鋒軍親教以  
蹶張弩技作整暇堂屏利局浚渠構室如治家事至元  
十九年改詹事丞時有司欲就威武營貸粟數萬石濟  
饑民裕宗在東宮以問慶端對曰兵民等耳何間焉即



命與之帝親征納顏命慶瑞以所部從時年六十餘與  
士卒同甘苦晝擐甲執兵夜臥不解衣暇則俾士卒為  
軍市自相懋遷征東之功慶端贊畫居多成宗即位拜  
金吾衛上將軍中書左丞行徽政副使兼隆福宮左都  
威衛使大德二年加平章政事僉書樞密院事卒

杜豐字唐臣汾州西河人仕金為平遙義軍穆昆太祖  
取太原豐率所部降授兵馬都提控從國王安扎爾攻  
平陽克絳州解州諸堡招集流民三萬餘家升征行元

帥左監軍金人南遁遂以豐守河北庚辰上黨張開以  
萬衆寇汾州豐率精騎五千敗之從下懷孟破溫谷木  
澗等寨攻洪洞西山斬首六百餘級攻松平山破之主  
午授河東南北路兵馬都元帥破玉女割渠等寨俘獲  
千餘人丙戌從昂吉諾延攻益都金守將突圍出豐戰  
扼之益都下遂畧地登萊降島民萬餘己丑以本部取  
沁州由是銅鞮武鄉襄垣綿山沁源諸縣皆下辛卯命  
豐撫定平陽太原真定及遼沁未降山寨皆平之乙未

升沁州長官長官者元初高爵也在沁十餘年寬繇薄賦勸課農桑民以富足丁未請老丙辰卒於家子思敬事世祖潛卽由平陽路同知累遷治書侍御史阿哈瑪特敗臺臣皆罷去思敬以帝所眷知獨留出為安西路總管再入中臺為侍御史時僧格以罪誅風紀為之振肅拜參知政事升中書左丞致仕卒諡文定

舒穆魯拜達勒契丹人仕金為霸州平曲水寨管民官太師國王穆呼哩師至霸州拜達勒迎降擢為千戶歲

甲戌覲太祖於雄州充漢軍都統帝次牛蘭山欲盡戮  
漢軍穆呼哩以拜達勒可用奏釋之因請隸麾下從平  
高州乙亥授左監軍從多果朗實里巴徇地山東大名  
比至洺州城守甚堅師不得進拜達勒不避矢石率衆  
先登拔之丁丑從平益都沂密萊淄戊寅從定太原忻  
代平陽諸州郡升霸州等路元帥以黑軍鎮守固安水  
寨既至令兵士屯田且耕且戰披荆棘立廬舍數年之  
間城市悉完為燕京外蔽辛卯從國王塔斯征河南癸

已從討萬勞於遼東所至有功以疾卒於官

賈塔爾琿冀州人太祖用兵中原募能用礮者籍為兵授塔爾琿四路總押以將之及攻益都下之加行元帥左監軍師還駐謙謙州古烏孫國也歲己丑將所部及契丹女真唐古漢兵攻鄂托羅爾城塔爾琿督諸軍穴城先入破之即軍中拜元帥從睿宗入散關畧關外四州經興元渡漢江略唐鄧申裕諸州河南平升總領都元帥從大帥塔沁攻徐邳平之十六年

按本傳上文己丑為太宗元年

下文戊午為憲宗八年考本紀自太宗卒子綽爾齊襲至憲宗俱不及十六年三字必有脫誤

從諸王伊遜克塔齊爾南征戊午卒於軍子吉魯襲卒  
第六十八襲至元間諸軍圍襄樊六十八帥所部戍駱駝  
嶺一字城立礮樊城南不發以怠敵心俄帥銳卒突出  
攻其城西破之十一年諸軍南征渡江明年宋常州守  
臣姚訾堅守不下六十八發礮摧其城壁宋援兵突至  
力戰却之常州既克帥府令總新附礮手軍臨安降從  
諸軍追宋二王至海下三十餘城累功授礮手軍匠萬

戶二十六年卒

鄂屯世英女真人其先世仕金為淄州刺史歲癸酉太祖下山東淄州民奉世英及弟保和迎降皆授以萬戶世英由萬戶遷德興府尹時金經畧使苗道潤率眾欲復山西世英克之將盡殺所俘其母責之曰汝華族也畏死而降此卒伍爾驅之死戰何忍殺之耶遂止巡部定襄卒於軍保和由萬戶升德興府元帥領真定保定順德諸道農事凡闢田二十餘萬畝改真定路勸農事

兼領諸署尋致仕子希愷襲勸農事郡縣有水旱必力請蠲租調南征時置軍儲倉於汴衛歲輸河北諸路粟以實之分冬月三限失終限者死尋以勸農使兼知冀州至元二年升知河中府秩滿歸調時阿哈瑪特專政官以賄成希愷不往見降知景州希元彰德漕運使希魯澧州路總管希尹中統三年李璫叛濟南丞相史天澤討之希尹謂天澤面陳利害願擊賊自効試其騎射壯之命充真定路行軍千戶與賊戰矢無虛發賊敗走



城中希尹請築外城圍之深溝高壘俟其糧絕不戰而坐待其困天澤從之瓊就擒錄功自右衛經歷累遷至同知廣東道宣慰司事卒

田雄字毅英北京人金末署軍都統歲辛未太祖軍至北京雄率衆降隸穆呼哩麾下從征興中廣寧諸郡定府州縣二十九平錦州張鯨兄弟之亂從攻柏鄉邢相辛巳從攻廊坊綏葭諸州有功授雄隰吉州刺史兼鎮戎軍節度使行都元帥府事平汾西霍山諸柵太宗時

從攻西和興元諸州又從攻夔萬諸州授行軍千戶召  
為御前先鋒奉旨招納河南降附得戶三十萬有奇民  
皆按堵而別部將校縱兵擄掠民惶懼悔降雄力為救  
護民得免於害癸巳授鎮撫陝西總管京兆等路事時  
關中苦於兵革郡縣蕭然雄披荆棘立官府開陳禍福  
四山堡砦間來附者日衆乃教民立田京兆大治定宗  
時入覲於和琳以疾卒追封西秦王子八人

張已圖昌平人歲辛未太祖南征已圖率衆來附願為

前驅遂留備宿衛從近臣呼圖克西征回紇河西諸番  
道隴蜀入洛屢戰流矢中頰不少卻帝聞而壯之賜名  
巴圖甲午金亡以呼圖克為礮手諸色軍民人匠都元  
帥守真定卒無子以巴圖代之及呼圖克兄子沙克善  
少長巴圖請於朝歸其政而終老焉子蒙古台從憲宗  
攻蜀釣魚山苦竹二壘以勇敢聞中統元年為行軍千  
戶從征襄樊有功卒子世澤襲從丞相巴延南征大小  
十餘戰皆有功又從平廣西收瓊萬諸州遷副萬戶從

鎮南王托歡伐交趾既還及再舉將校舊嘗往者許留  
恤之有當行者適病不能起世澤曰吾祖父以武勇稱  
吾蒙餘澤荷國厚恩當輸忠王室增光前人豈可為苟  
安計耶力請代之凱還入服其義云

張榮清州人歲甲戌從金太保明安降授元帥左都監  
略東平益都諸郡戊寅領軍匠從太祖征西域諸國至  
穆稜河不能涉太祖召問濟河之策榮請造舟乃督工  
匠造船百艘遂濟河太祖嘉其能賜名烏蘇齊升礮水

手元帥甲申從征河西乙酉從征關西五路攻鳳翔礮  
傷右髀帝命養病於雲內州庚寅卒子諾爾布襲礮水  
手元帥太祖伐金命由關西小口收附金昌州等郡甲  
辰領蒙古漢軍守均州戊申宋兵襲均州諾爾布拒戰  
大敗宋師己酉復與宋兵戰流矢中右臂中統三年卒  
子君佐襲戍蔡州五年都元帥阿珠命將礮手兵攻襄  
陽至元八年調守襄陽一字城橐駝嶺攻南門牛角堡  
破之攻樊城親立礮摧其角樓十一年從軍下漢江至

沙洋丞相已延命率礮手軍攻其北面焚城中民舍幾盡遂破之又以火礮攻破陽羅堡十二年從大軍與宋將孫虎臣戰於丁家洲復從攻揚州破常州十三年屯軍真揚間絕宋糧道宋制置李庭芝都統姜才棄城走

續綱目云李庭芝姜才死之按庭芝固守揚州力戰不下會福州召命至乃令副使朱煥守揚而自與姜才率兵趨泰州將東入海被執不屈俱死本傳序榮之績故褒貶各異其詞 揚州平授安慶府

安撫司軍民達嚕噶齊十四年安慶野人原及司空山天堂賊將攻安慶時城中軍僅數百人君佐命搃賊出

金史卷之八十八  
表四百五十八  
沒要道賊不敢入乃寇黃州行省命君佐率衆復黃州  
因以為黃州達魯噶齊十九年命率新附漢軍修膠西  
閘壩以通漕運二十一年兼海道運糧事卒

趙天錫字受之冠氏人金貞祐之亂父林保冠氏有功  
授冠氏令大安末天錫入粟佐軍補修武校尉太祖遣  
兵南下防禦使蘇政以為冠氏令乃挈縣人壁桃源天  
平諸山歲辛巳歸行臺東平嚴實隸帳下從征上黨以  
功遷元帥左都監兼令如故甲申宋將彭義斌據大名

寇氏元帥李全降之

按宋史寧宗紀及李全傳嘉定十一年戊寅李全降宋十五年壬午

彭美斌復京東州縣時嚴實將晁海以青崖峒降是李全未嘗降於義斌也本傳紀年紀事俱不相符疑有錯誤

天錫率將佐往依大將布爾罕軍未幾破義斌於真

定授同知大名路兵馬都總管事李全在大名結其帥

蘇椿約金河南從宜鄭倜日以取寇氏為事天錫每戰

輒勝一日倜自將萬人來攻天錫率死士乘城力戰三

晝夜倜度不能下乘風霾遁去戊戌征宋置兵蘄黃間

被病還卒子賁身



賁亨字文甫襲行軍千戶從國兵渡江攻鄂有功至元  
五年總管山東諸翼軍征宋出抄斡黃以五百人拔野  
人原寫山砦修白河新城七年命為征行千戶攻樊城  
冒矢石擁盾先登破之十一年修東西正陽城敗夏貴  
於淮從攻鎮江與宋將孫虎臣張世傑大戰於焦山殺  
掠甚衆江南平以功授處州路總管府達嚕噶齊未行  
盜發澈浦行省檄為招討使率兵平之處州青田縣季  
文龍章焱殺知府叛賁亨獲其黨始知七縣俱反文龍

據處州天慶觀賁亨率衆圍之陳於下河門賊出戰以  
精騎蹂之遂棄城突圍走賁亨乃招散亡立官府姦復  
合衆來攻陣惡溪南賁亨分兵拒守自將精銳亂流衝  
擊屬萬戶呼圖克台以援兵至賊方退文龍溺死呼圖  
克台以處即山為州無城壁可恃且反側欲屠之賁亨  
曰我受命來監此郡賊固可殺良民何辜不從十五年  
龍泉縣張三八合衆二萬殺慶元縣達嚕噶齊伊蘇岱  
爾且屠其家賁亨將騎士五百往討與賊將戰於浮雲

鄉敗之軍還賊衆水陸俱設伏賁亨擇步卒驍悍者使  
前賊不敢近既而衢州陳干二逐昌葉丙六聚衆數萬  
助之賁亨前後悉平之十七年改處州路管軍萬戶二  
十二年還寇氏卒

欽定續通志卷四百五十八